

NKÓLO na biso YESU KRISTO akumisama.

Boyei malamumu na bolimboli ya mokanda ya Estere. Lelo tozali na *mokapo ya 4*. Ezali malamumu ete otanga yo moko mokapo oyo mpe oyo eleki liboso, mpo ozwa bososoli ya solo oyo ebombami na mokanda oyo ya Estere, na lisalisi ya Molimo Mosantu.

Tomoni ete nsima ya Hamani kobimisa mobeko ya koboma Bayuda nyonso kati na bituka nyonso ya mokili, likambo yango epesaki Bayuda mawa makasi. Bomikundola ete na mobeko ya Bamedo mpe Baperse, mobeko nyonso oyo mokonzi asili kobimisa ezalaki kokoki kobongwana te. Ndenge moko esalemaki na tango ya Daniele, tango babimisaki mobeko ya kobwaka ye na libulu ya nkosi. Ata mokonzi alingaki kobikisa Daniele, akokaki te, mpo mobeko ya Bamedo mpe Baperse ezalaki kobongwana te.

Yango wana, tango Mordekai ayebaki makambo wana, ye mpe Bayuda nyonso babandaki kolela mpe koyoka mawa makasi, ndenge Biblia elobi:

Estere 4:1-3 (Mokanda na Bomoi)

1 “Tango Mordekai ayokaki makambo nyonso oyo esalemaki,

apasolaki bilamba na ye, alataki saki mpe amipakolaki putulu; abimaki na engumba mpe agangaki na mongongo makasi ya mpasi.

2 Akómaki kino liboso ya ekuke ya mokonzi, mpo moto moko te akokaki kokota na ekuke ya mokonzi soki alataki saki.

3 Na etuka nyonso oyo mobeko ya mokonzi ekómaki, Bayuda bazalaki na mawa makasi, bakilaki bilei, balelaki mpe basalaki matanga; mingi balalaki likolo ya saki mpe putulu.”

Mordekai amonaki ete nzela kaka moko ya kozwa lobiko ezalaki koleka na nzela ya Mokonzi mwasi Estere. Boye ayebisaki Estere makambo nyonso oyo Hamani akanaki mpo na koboma Bayuda, mpe abondelaki ye asenga mokonzi abongola mokano yango.

Kasi Estere apesaki eyano mosusu: moto moko te akokaki kokota na lopango ya kati ya mokonzi soki abengami te; moto nyonso oyo akokota kozanga kobengama akokufa.

Estere 4:10-11 (Mokanda na Bomoi)

10 Estere alobaki na Ataki mpe atindaki ye epai ya Mordekai mpo na koyebisa ye boye:

11 “Basali nyonso ya mokonzi mpe bato nyonso ya bituka

bayebi ete moto nyonso — mobali to mwasi — oyo akokota epai ya mokonzi na lopango ya kati kozanga kobengama azali na mobeko moko: asengeli kokufa; kaka soki mokonzi asemboli lingenda na ye ya wolo mpo na kopesa ye bomoi. Mpe ngai moko, babengi ngai epai ya mokonzi te banda mikolo tuku misato.”

Kasi Mordekai alendisaki Estere lisusu mpe alobaki:

Estere 4:14 (Mokanda na Bomoi)

“Soki okangi monoko na yo na tango oyo, lisungi mpe lobiko mpo na Bayuda ekouta na esika mosusu; kasi yo mpe ndako ya tata na yo bokobebisama. MPE NANI AYEBI SOKI OKÓMI NA BOKONZI TE MPO NA TANGO LOKOLA OYO?”

Na sima, Mokonzi mwasi Estere azwaki mokano ya kokende epai ya mokonzi atako mobeko epekisaki yango. Kasi liboso asalaki yango, asengaki Bayuda nyonso bakila bilei mikolo misato mpo na ye, mpo azwa ngolu liboso ya mokonzi.

Nsima ya mikolo yango, tango akendeki epai ya mokonzi, Nzambe

apesaki ye ngolu. Na esika ya kokufa, azwaki kondimama monene kino mokonzi alakelaki ye kopesa ye ata ndambo ya bokonzi soki alingi.

Liteya nini tozwi awa?

Estere azali elilingi ya Mwasi ya libala ya Kristo. Andimaki kotia bomoi na ye na likama mpo na lobiko ya bandeko na ye. Yango ezali koteya biso bakristo ete tosengeli komipesa mpo na lobiko ya bato mosusu, ata soki tokobungisa nini.

Nkolo Yesu alobaki:

M

atayo 10:39 (Mokanda na Bomoi)

“Moto oyo akobatela bomoi na ye akobungisa yango; kasi moto oyo akobungisa bomoi na ye mpo na ngai akobikisa yango.”

Nzambe azali malamumu. Atako Estere atiaki bomoi na ye na likama, na suka azwaki bomoi mpo asalaki yango mpo na bato na ye.

Ndenge moko mpe biso oyo tobengami Mwasi ya libala na molimo, esengeli kozala batatoli ya sembo ya Kristo bisika nyonso Nzambe atiye biso — na lingomba, na libota, na lisanga, na mosala, to na bokonzi — kozanga kobanga makama oyo ekoki koya. Tosengeli komema bato epai ya Kristo mpo babima na mitambo ya kufa ya Satana.

Satana azali lokola Hamani, alingi kobebisa bato ya Nzambe. Kasi nani akozala pene ya komipesa mpo na bango? Ezali yo oyo Nkolo apesi ngolu ya koyeba Ye.

Mordekai atunaki Estere:

“NANI AYEBI SOKI OKÓMI NA BOKONZI TE MPO NA TANGO LOKOLA OYO?”

Ndenge moko, esika oyo ozali — na lingomba, na libota, na mosala, na bokambi to na esika nyonso — nani ayebi soki Nzambe atiye yo wana mpo na tango lokola oyo mpo na lobiko ya bato na Ye?

Bandá kosala yango mpe okomona ngolu ya Nzambe. Ata soki ozali kobanga kobungisa mosala, lokumu to biloko mosusu, yeba ete soki okumisi Nzambe, Ye mpe akokumisa yo mpe akofungolela yo nzela ata esika nzela ezali te.

Bandá lelo kozala motatoli ya Kristo. Yokela bato mawa ndenge bazali kobunga, mpe Nzambe akopambola yo.

Eloko nyonso Nzambe apesi yo — ezala bokonzi, bomengo, boyebi, mayele, kelasi, lokumu, makasi, talenti, bolenge to tango — salela yango mpo na NKÓLO, mpo nani ayebi soki opesamaki yango mpo na tango lokola oyo mpo bato ya Nzambe babika?

Okoki koloba ete esika ozali ebongi te mpo na mokristo. Kasi nani ayebi soki Nzambe atiyé yo wana mpo na mokano moko ya kobikisa bato?

Bómikundola: esika Estere azalaki ezalaki te esika ebongi mpenza na mibeko ya Bayuda, mpo mobeko epekisaki kobala bato ya bikólo mosusu. Kasi nani ayebi soki Nzambe atikaki yango esalema mpo na lobiko ya bato na Ye na mikolo ekoya?

Yango wana, ndeko, esika nyonso ozali, salá eloko mpo na

Nzambe, mpe Ye akopesa yo ngolu malamumu.

Nzambe apambola yo mingi.

Share on:
WhatsApp